

considerare negligentes, eas referunt ad dæmones, quidam ad cælum, alij ad deum: sed non ita viri prudentes & studiosi. Vnde nec Auicenna cum vulgo sentit, imò causas dat naturales & remedia cōpetentia, qui vtique essent inutilia, si hæc à dæmone fierēt, neque enim per remedia medicinæ adhibita dæmon fugaretur. De viris autē sanctis qui hoc sentire visi sunt, vel hoc ad mouendum ad deuotionem dixerunt, vel mysticè exponunt, vel simpliciter alijs credendo locuti sunt. Cæterum quod de Euangelio Christi adductum est, fatemur Christum per omnipotentiam suæ diuinitatis ad ostensionē miraculorū talia permisisse, scilicet vt dæmones corpora quorundam possiderent & eos vexarēt, vt eos expellēdo se super omnia dominū ostenderet: sed non est consequentia efficax, Christus ita tunc fecit, igitur & nunc facit. Non enim fiūt miracula præter causam, quæ nunc non conuenienter posset assignari. quin equaliter affirmare possem, omnem morbum facere dæmonem. Vnde & plures sancti viri nimis faciliter multa credere potuerūt, sicut sunt multi qui omnibus quæ scripta legunt assentiūtur, ignorātes quā multi fuerunt malè scribentes. imò & multi theologi ad causas cognoscendas intellectum non apponentes, sæpe plus de miraculis creduli quā deceret gradum eorum in huiusmodi deluduntur, contra